

Nuna tamakkerlugu iliuusissatut pilersaarummik, meeqqat inuusuttullu sumiginnarneqartut ikilisarnissaannut sammititamik Naalakkersuisut kingusinnerpaamik UKA2019-imi suliaqarnissaat pillugu, Inatsisartuni aalajangiiffigisassatut siunnersuut.

(Inatsisartuni ilaasortaq, Sara Olsvig, Inuit Ataqatigiit)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Siullermeerneqarnera

Naalakkersuisut Inatsisartut aalajangiiffigisassaattut siunnersuummut saqqummiunneqartumut qujapput.

Meeqqat sumiginnarneqartunut tunngatillugu oqaatsinik imaqqangitsunik pisariaqartitsinnginnatta siunnersuuteqartoq oqarmat Naalakkersuisut isumaqatigaat. Iliuseqartariaqarpugummi.

Massakkut iliuseqarnissarput pisariaqarpoq, suliallu nukinginnartut isumagalugit. Peqatigitillugulu siunissaq ungasinnerusoq eqqarsaatigalugu, tamakkiisumillu isiginnilluta sulinissarput pisariaqartinneqarpoq. Sumiginnaanerit ikilisittariaqarpavut, meeqqallu sumiginnarneqartut pinngitsoortivinnissaat anguniarsaralugu.

Naalakkersuisut suliniutinik sumiginnaasernerit ikilisarnissaannik siunertaqarfiusunik aamma susassaqarfimmi suliniutit patajaallisarnissaannut aallartitserneerikuupput.

Aggustimi Naalakkersuisut kinguaassiuutitigut atornerluisarnernut periusissartik "Killiliisa" tamanut saqqummiuppaat. Killiliisa tamakkiisumik sammiveqartumik siunissamullu ungasinnerusumut sulisoqarnissaa pillugu suliaavoq. Killiliisa iliuusissatut pilersaarutinut arlalinnut tunngaviliisuusaaq, tamannalu aqqutigalugu kinguaassiuutitigut atornerluinerit ikilisarnissaannut iluaqutaassalluni. Naalakkersuisut sumiginnaasarnermut isiginninniarnernut patajaallisarnikumut Killiliisa ilaavoq.

Naalakkersuinikkut Ataqatigiissaarisartoqatigiinni ukioq manna januaarimi ataatsimiinnermi innersuussutigineqartut tunngavigalugit, Naalakkersuisut kommuninik, taakkualu inunnik isumaginnittoqarfiinik oqaloqateqarlutik aallartissimapput. Taamaaliortoqarpoq atugassarititanut oqartussaasoqarfinni assigiinngitsunik sulialinni, meeqqat inuusuttullu pillugit suliassani pitsaanerusumik suleqatigiittoqarnissaanut, kommunit ajornasaartarnerannut annerusumik paasisaqarnissaq siunertaralugu.

Naalakkersuisut tamatuma saniatigut ilaqutariinnut politikkisamik saqqummiinissamik anguniagaqarput. Meeqqanut inuusuttunullu susassaqarfimmi suliniutigineqartut, meeqqamik taassumalu ilaqutaanik aallaaveqartarnissaasa qulakkeernissaa, ilaqutariinnut ataatsimut politikkeqarnermi siunertaavoq. Suliniutit taamaalillutik ilaqutariinnut tamakkiisumik isiginniffiusariaqarput, meeqqallu attaveqarfigisartagai tamakkerlugit ilanngunneqassapput aaqiissutaasinnaasunullu ilanngullugit.

Aammalu inunnik isumaginninnerup iluani ilinniartitaanernut suliniuteqarnerit patajaallisarnissaannut, annertusarnissaannut ineriartorteqqinnissaannullu Aningaasanut Inatsimmi aningaasanik immikkoortitsisoqarsimavoq. Aamma meeqqat inuusuttullu peroriartorminnermi, sulisunik pisinnaasalinnik sulihamullu naleqquttunik naapitsisarnissaat, meeqqat inuusuttullu toqqissisimanartumik peqqissuullutillu inerikkiartornissaannut pingaaruteqartunut ilaapput. Tamannalu pissutigalugu inunnik isumaginnittoqarfinni sulisunut ingerlaavartumik ilinniartitseqqittarnissat pikkorissartitsisarnissallu neqeroorutigisarnissaat Naalackersuisut aalajangiusimavaat.

Sumiginnaanermullu tunngatillugu, unammilligassat qaangerniarnissaannut oqartussaaffinnit arlalinnit suleqatigiittoqarnissaa akisussaassuseqartoqarnissaalu pisariaqartoq, siunnersuuteqartoq Naalackersuisut isumaqatigaat. Taamaalillunilu Peqqissutsimut Aqutsisoqarfiup, Ilinniartitaanermut Aqutsisoqarfiup aamma Isumaginninnermut Aqutsisoqarfiup iluani suleqatigiinnermik aallartitsisoqarsimavoq, taamatullu suleqatigiinnerup meeqqanik sumiginnaasoqarneranik pasitsaassisoqartillugu annerusumik ataqatigiissaarisooqartarnissaa qulakkeerneqassaaq. Suleqatigiinnermi aamma ilaqtariinnut atugarliortunut, siusissukkut suliniuteqarnerit qanoq iliorluni oqartussaaffiit pingasuusut akornanni, nukittorsaaffigineqarsinnaanersut qitiutinneqarput.

Sumiginnarneqartut ikilisarneqarnissaannut nuna tamakkerlugu iliuusissatut pilersaarusiortoqarnissaani, sulinermi suliniutit pioreersut aallaavigineqarnissaat naammattuusoq Naalackersuisut isumaqarput. Taamaaliorluta siusinnerusukkut misilittagaareersut iluaqutissarsiffigissavavut, suliniutillu aallartinneqareersut pingaartissavavut. Nuna tamakkerlugu iliuusissatut pilersaarutip taamaalilluni Killiliisami, MANUmi siusissukkullu suliniuteqarnerit ilaatigut ilanngutissavai.

Taamatut oqaaseqarlunga siunnersuut Naalackersuisut sinnerlugit ilalerpara inassutigalugulu siunnersuutip akuersissutigineqarnissaa.